

太上大道玉清經卷之四

上元品第九

爾時 上元大慶 正月十四日晨朝之時 二景交暉 月華收彩
星精斂曜 圓羅啟旦 芒霞疊照 太空虛朗 香花互啟 元氣發
生 和液入堅 地霧輕霧 天散浮煙 海清不波 玄源演津 飛蓋
彌羅 丹旌吐雲 靈幡飄飄 華焱雰雰 空樂長鼓 虛籟永吟 五
精導途 雙景翼軒

爾時 上元太真皇極天尊與諸侍從 日宮之中雲霞寶座 齊下
神足 安庠而起 登於焱輪 凝精寶車 香雲纏蓋 慶霄四冥 騰
皇整轡 金光理御 正中之時 下觀十天 盼看六合 後會陽寥之
宮

爾時 天尊與諸大聖俱放慈光 從心中出 明照幽顯 無遺纖
塵 光非千色 無有邊際 天上地下 朗然無滯 法輪常轉 群生
俱會 噓太和以發萌 呼柔弱以散剛 甲裂盤施 含靈躡馳 琳碧
敷華 瓊根秀枝 至十五日日中之時 三天仙人無數億眾 不可記
字 心越五通 身無死地 能調六軍 降十大怨 在於郊間 忍辱

太上大道玉清經卷四

清微藏書閣

之地 權立一城 高廣無比 有四大門 樓峙聳峻 出於雲心 悉
用七寶以為關鍵 渠濠深邃 洞入淵際 其城之端有三萬六千寮孔
網以珠縑 地以蒼珉 墀道周匝 平夷廣遠 城中宮殿亦悉高妙
陰輝燭夜 朗然無翳 珍玩穀帛 盈積府庫 是諸仙人 大設天儀
雷震法鼓 秉大丹節 舉大丹旌 仗大金鉞 搗大神劍 精器利
銳 譬如麟角 服大法鎧 柔如雲袍 善卻毒箭 五兵不傷 是諸
仙人手執鈎鑲 鋒芒纖礪 前驅後殿 威如鳳爪 晨朝之時 俱駕
六龍 齊引寶車 出於郊間 陳列威儀 鳴鼓吹角 未及作令 怨
敵以伏 解甲釋衣 雄氣頓靡 銷金裂鼓 摧旌毀節 被髮解帶
披心露膽 膝行肘步 下風而趨 匍匐求盟 心血自見 仙人各擁
命魔靈幡 導諸投化 登太玄之路 入洞清之源 陟長明之阿 昇
金鳳之壇 焚逆風名香 誥以左契 醮以玄津 時諸大怨睹此神妙
忍辱之力 誠知無比 心靈頓改 願為仙人 作善知識 爾時
仙人至於食時 與諸侍從翻入大城 於其城中 各捨威儀 齎百寶
名珍 神鄉奇物 昇入上清 供養天尊 所謂日月寶珠 星精寶珠
陽燧寶珠 陰諸寶珠 曜電寶珠 驪龍寶珠 忍辱寶珠 大悲寶

珠 大慈寶珠 六度寶珠 絕塵寶珠 和光寶珠 無瑕寶珠 離欲
寶珠 含真寶珠 英華寶珠 堅固寶珠 精進寶珠 持戒寶珠 心
海寶珠 智慧寶珠 方便寶珠 雲雷寶珠 和風寶珠 發生寶珠
甘露寶珠 如意寶珠 是諸寶珠光彩各異 圓明一等 復有三種無
價善寶 所謂大慈善寶 儉約善寶 退讓善寶 如此善寶 若有眾
生懷此寶者 所求如意 無願不剋 若有眾生為諸病苦 懷此寶者
病自消除 若有眾生心多反逆 懷此寶者 自然慈順 若有人王
天下不化 災殃屢表 鄰國鬥爭 五兵交戰 百穀不熟 水旱不
調 群臣陰謀 懷此寶者 天下自化 災殃不生 鄰國交好 金芒
喪精 百穀四熟 水旱調平 群臣盡節 陰賊不生 是諸仙人復寶
四種香飯 所謂豐山香飯 龍山香飯 浮山香飯 太和香飯 香氣
豐布 食之無盡 是諸仙人復齋七種寶漿 日精寶漿 月華寶漿
星精寶漿 甘露寶漿 金液寶漿 靈光寶漿 玉匱寶漿 各以諸天
寶器盛諸供具 復齋無價寶衣 所謂自然瓊羅寶衣 自然雲錦寶衣
自然流霞寶衣 復齋無價名香 所謂反魂名香 反風名香 逆風
名香 七色名香 復齋諸天雜果 所謂萬歲靈桃 空洞靈瓜 霜梨

太上大道玉清經卷四

清微藏書閣

玉棗 赤子金葩 種種珍奇 來至會所 供養天尊 大獻珍寶 列
滿玄中 香氣氤氳 周流十方 百寶光彩 映朗無際 時諸仙人圍
遶天尊 百千萬匝 齊鼓天樂 太和之曲 億變萬轉 音聲和美
清妙寥亮 神禽鼓翼而騰舞 靈獸叩節以齊和 龍吟鳳歌 眾音合
會 清風吹絳樹之響 名香轉徘徊之蓋 日月停輪 眾星曉明 芳
煙拂迴 甘露如傾 是諸仙人良久之間 輟眾音之繁會 弭未遇之
高節 收疊飛蓋 傍息騰皇 併卻焱輪 虛立雲庭 一時稽首 問
訊天尊而作是言 不審天尊眾善法身 道化慇懃 以勞聖慮 萬兆
無福 實貫神心 而塵穢蒙籠 根業沉濁 仰佩玄祐 曉夕開懷
悽悽之誠 恒對心目 空形任道 無以報恩 復念生成 未能忘本
塵眾相率 建此微心 而三天罄窮 敢獻塵露 藉以上元大慶
慈尊高會 天恩無限 不間塵臭 願為納受所獻丹心 言畢稽首
伏聽哀旨

爾時 天尊凝思遠視 神彩冲邈 金顏發輝 真光四照 萬天
在眸 神力周備 塵界非遙 令諸仙人心疑豁消 是時天尊即命右
侍金童焚香百和 反風名香 又命左真上相千二百人齊鼓雲和之璈

又命左直主春上元真宰 千二百人 齊擊神金天寶之鐘 又命東
極太仙 九千人 以扣萬石紫瓊之磬 又命西極太仙 六千人 齊
擊神山天寶方金 又命和風 吹出空洞萬變之音 眾樂齊奏 良久
之間 九色雲龍蜿蜷騰舞 八霞回空 香風轉苑 騫鸞翔鳳 靈禽
仙獸 長吟虛庭 不緩不急 如飛雲之旋天 似迴波之引流 眾音
之中 演出空洞微辭 而告仙人曰
上元正氣皆自然 主生皇極為眾緣
紫房吹動氤氳氣 太和流行散剛堅
大道生成法如此 故我移居治此天
風雷消解諸盤結 六氣能驚長夜眠
此亦神功自通妙 非關吾強使之然
眾寶以陳玄理界 即是虛心上福田
爾時 諸仙人聞空中微辭之音 自然妙響 清通虛豁 道德流
布 理無不存 歡喜適內 神光發外 一切有生皆發英華 昇沉飛
走踴躍騰舞 寶樹香草應時花敷 諸雜根枝萌芽啟甲 是諸仙人登
六通果 九祖承慶 兔離憂苦 上元之功 其德如此 三日三夜

太上大道玉清經卷四

清微藏書閣

天事乃畢

爾時 天尊為受供已 轉設天真靡不周遍 以無相施故 如道
神力 果報無窮 香飯寶漿 湛然不減 日月寶珠 彌加明盛 時
諸名香 其氣不絕 是諸仙人大眾之中有一上仙 名曰昌期 而作
步虛曰

整控啟皇極 乘運入中天 披空獻心寶 妙覺朗身田
日宮散和氣 寥庭騰願煙 大道難思議 隆福慧無邊
空身遊道境 冥心入太無 披玄尋實際 幽契自相符
故能明假外 噓累絕群愚 誰知不死道 遐因空洞書
玄風鼓太無 天樂演微音 龍章昭鳳彩 玉宇發虛琴
飛焱上雲路 散髮寫瓊簪 稽首禮皇極 焚香陳我襟
爾時 仙人說步虛已 重復稽首 請問天尊而作是言 上元高
會 以蒙仰睹 沐浴恩化 空心荷佩 福被幽顯 存亡獲濟 忘退
罪愆 願垂赦宥 欲從天尊 求乞一願 願為四天之下 一切眾生
度脫苦惱 免諸厄難 欲請天尊下降丹臺神州之中 大度天下人及
非人

於是 皇極天尊而告仙人言 汝等當知三元高會 良辰吉日
元乎正氣 正氣化生一氣 一氣化生平氣 如此三氣 上應三元天
寶宮 所謂日宮 月宮 星宮 宮有一尊 我處日宮 號曰皇極天
尊 主於上元正月十五日春陽之時 發生萬物 月宮之真 號曰正
一天尊 主於中元七月十五日 以成萬物 星宮之真號曰眾妙天尊
主於下元十月十五日 藏養萬物 子但專心於神州之中 及四天
之下 教化眾生 令遠邪道 宣揚三尊真帝名字 晨夕願念 至此
之日 三尊互下 降臨洞府 分形萬億 濟諸天人
爾時 眾仙謹承明敕 以正月十七日 日暝之時辭別天尊 歸
於下界 過北斗之中 夜候真人 朝謁靈童 停留七日 而下神州
會於首山之上 議定流化三日三夜之後 東到扶桑之陽 南到炎
洲火池之陽 西之崦嵫流金之西 北越陰谷積雪之北 次到負壘
青丘 崦嵫 具茨 以次告報新得道者 一如上元皇極天尊 金口
辭也 云中元大會 七月十四日 正一天尊下降神州 各令仙人下
同具備 謠歌唱令真帝名字 聞四天下 各令此日辦諸天供 具盡
世所有 施安床座 幡花 香燭 心心繼念 是時四天之下 同於

太上大道玉清經卷四

清微藏書閣

此日 殊心合契

中元品第十

七月十四日晨朝之時 天下仙人及諸國王 一切人民仰視上方
渴如所待

爾時 正一天尊與諸大聖 六千萬上真之眾 各乘月宮而下其
中 諸人皆見 如雲之垂 降臨下土 為人保證無上福田

爾時 天尊將二侍者下於丹臺 諸餘真眾各赴所感 丹臺群仙
侍從天尊 至十五日日中之時

青丘仙人 八十一萬眾 俱乘青龍之輿 齋諸供具 來至會所

員壘仙人 六十四萬眾 俱乘朱雀之輿 齋諸供具 來至會所

崦嵫仙人 三十六萬眾 俱乘白虎之輿 齋諸供具 來至會所

具茨仙人 二十五萬眾 俱乘玄武之輿 齋諸供具 來至會所

崦嵫天仙 二十五億萬眾 俱乘黃龍之輿 齋諸供具 來至會所

須臾之頃 東九夷 南八蠻 西六戎 北五狄邊遠之方 諸仙

人等各齋供獻 承道威神 浮空而至 各各陳列供養之具 奉獻天

尊 陳列事畢 圍遶天尊步虛歌讚 焚香散花 作天伎樂 眾音合

響 神風徘徊 香光纏虛 列位以次 俯仰節度 左齊右整 北面
長跪 微言寂氣 問訊起居而作是言 萬兆紛紜 多惡少善 不期
感動 降下高尊 而此塵穢之徒竊好真道 濫當開度 功不補過
無能自勉 又恐九祖承負釁咎 墮在幽局 或生出殊方 受形異類
幸藉微緣 遭遇大聖 不動而感 高會良辰 小兆微生敢求多福
唯願天尊誨示未聞 開發金口 演出靈章 中元寶經 開度後世
爾時 天尊高抗深視 良久而言 月宮兆魄 圓羅孕輝 隰壤
消煩 金風扇威 火木藏養 炎涼氣交 皇華垂津 收束氛妖 吉
辰開宥 萬帝來朝 六塵外靜 三毒內消 二世獲安 介福所招
無所之先 朴散為元 形名之後 妖邪所怨 萬物亡本 進退乖根
良辰不度 無思道恩 悠悠萬兆 痛不能言
爾時 天尊說此語已 俯而彈指數聲 天地震動 河海騰波
神氣不暢 悲風不和 是時 眾仙各起禮謝 而作是言 不審天尊
以何因緣 俯而彈指 天地震動 日月不明 神氣不暢 悲風不和
小兆道淺 不達至理 心中疑懼 不能自寧 唯願天尊大慈憐愍
哀所不悟 唯垂分別 誨以未聞

太上大道玉清經卷四

清微藏書閣

天尊告言 我無名之先 真道大行 言教未施 天下德化 我
見世後 人民多智 各習異端 尚多聞見 仁義互興 財食親輔
棄貧賤弱 父子相嫌 君臣不忠 六親怨爭 鄰國相讎 四海交兵
以是因緣 不善增長 輪轉相報 無解脫時 不如今日 眾生尚
善 初來聖眾 降四天下 一切眾生 欲求智慧 以離愚道 漸漸
工偽 百競馳起 雖地獄空虛 不久盈滿 以是因緣 故我彈指
眾仙聞說 不覺悲悴
爾時 崆峒仙人從座而起 稽首作禮 請問天尊 不審群化之
心可迴改不 欲請天尊 自在神力 防遏萬原之端 擁未萌於機上
使合生復根 億兆藏初 唯守一道 泯絕群生 心無起滅 形同
太虛

天尊告曰 善哉善哉 善男子 汝所言者 是大道之第二十之
子也 何以故 大道元乎虛朴 虛朴散為元氣 元氣自然 成形有
生 從生立名 因名有言 因言生正教 正教生即智慧生 智慧生
即巧偽工 巧偽工即愚智辯 愚智辯即是非起 是非起即憎愛生
憎愛生即攻戰作 攻戰作即君臣立 君臣立即萌賞罰 賞罰萌即利

害見 利害見即陰賊生 陰賊生即罪目結 罪月結則冥司立 冥司立則有水火之罰 輪轉無窮 自然如此 非道為之 汝所言者 居乎萬機之下 故曰我道雖明 背之則暗 我道中正 反之則邪 我道柔弱 捨之則剛 我道長生 輕之則亡 大道無親 唯與善人 我觀群化 非可卒正 自有萬分之一生感和氣 歸原復根 大道為此下流正教 以表群目 欲其影從 而汝後學即斯人也 大道為爾時 崆峒仙人請問天尊 不審水火之罰 其義云何 小兆不達 願垂分別

天尊告言 水火之罰 凡有四種 陰陽二過 冥司謫之 經水過火 所謂冰炭之罰也 眾垢齊積 焦沉禍至 天屯地否 水火交會 乾極則八海騰煙 山嶽灰燼 天門祕捷 金玉銷爍 三景藏精 風雷扇炎 火翳流焰 天地成治 地否之時 陰成告瑞 移陸溟海 中天涌波 眾真遷治 西北水母形如素旒 眾鳥南飛 群聚天際 飄風激濤 崩騰山嶽 金石相觸 磨滅泥滓 善男子 汝今當知 此二大災以應天下 及以萬民 何以故 天下無道 萬民不化 此災者 喻如眾生五內反逆 蓄泄不調 自然成患 況於天下失

太上大道玉清經卷四

清微藏書閣

道敗德 眾塵齊累 天地愍之不能已 苦應施罰 前示其教 次告其氣 後垂其象 愚癡之人不信正教 不明氣象 凶惡不改 天不得已 示其大威 譬如臣子 君父寵念 承恩驕恣 變心失忠 不孝君父 私懷反逆 謀狀以露 仁君慈父猶不即滅 先當施令如是 臣子心猶不悔 後付司殺 君猶哀之 但不得已 天帝亦爾 時諸仙人聞天尊所說 皆悉歎言 未曾有也 禮謝天尊 煩勞金口 愍諸小兆 宣示未聞 荷負恩造 流霈之澤 禮謝畢已 天尊告敕 令復本座 至十七日晨朝之時 正一天尊初來 真眾應緣 畢已 從四天下歸入丹臺 問訊天尊 起居道化 得無勞極

天尊告言 真化無勞 道化無極 子赴萬兆 得無疲厭 眾真

答言 承道威神 豈有疲厭 得解脫不 眾真答言 地獄罪魂 以天尊下降丹臺之時 登即解脫 四天之下 一切兆民 雖解無脫 爾時 丹臺諸仙 聞上真之言 心中不達 爾時 昌期仙人即從座起 稽首天尊 云何地獄罪魂 未見天尊而得解脫 云何四天下

一切兆民雖解無脫 願為分別

天尊告言 善男子 汝今諦聽 吾為汝說 所謂大道藏用 雖濟度萬物而不為尸 暗德運載 以是因緣 能令罪魂而得解脫 雖解無脫者 所謂天下人民雖解煩惱性空 而不免脫 何以故 凡夫之人雖解法性 不習真常 但明至理 身在合道 是故道與理乖 譬如有人身坐狹室 心遊十方 無所障礙 或說至理 聰辯無滯 離合隨心 此名心得入理 不名身得入道 以是義故 理雖合道 不能令身而入理 喻如夢遊 身不隨心 是故眾生心得入理 身不入道 心入理者 名之為解 身不入道 名為無解 無極大道 身心無礙 能令微塵世界一時赴感 故曰大道自在解脫 能令十方世界如觀掌中 前際亦復如是 是時天尊說此語已 即放左手五指十種光明遍照虛空 令十方世界俱見光中 時此大會真人 仙人 靈人悉皆洞睹微塵世界 又於光中見其二際 身所經業 了了分明 是諸仙人洞觀希微 道窮真常 皆得六通自在之力 九祖獲慶 受生道境 天尊中元之緣畢已 七日晨朝之時 天尊大眾俱昇雲輅 玄風鼓樂 紫霞虛邁 空谷謠歌 天吟萬籟

太上大道玉清經卷四

清微藏書閣

爾時 眾仙而作步虛曰

吉光騰紫氣 霄輅逸丹天 翻颺香風轉 蓋動起浮煙 道中還

復道 玄中已復玄 真光不識際 大象竟無形 法輪常自轉 希音

不可聽 空閑侍三寶 虛中聞洞經 七變遊魂反 萬氣駐顏齡 香

風飄羽蓋 遊氣轉焱車 泠泠上雲路 窈窈入長虛 顧愍埃虛子

應運演靈書 妙果諧今日 冥契自然符

爾時 仙人上送天尊 歌頌讚歎 入至雲庭 過四十天門 是

時天尊止諸仙人言 天路遙長 無勞遠送 是諸仙人俯仰躊躇 良

久之間

天尊愍之 重告仙曰 子後學成道 雖得六通數千萬劫 猶是

人身 與我大眾自然之體 光氣微妙 未可全同 天尊即命運氣上

真 調暢玄風 噓出無上萬變靈章 雲和清雅太玄之辭三十九篇

其時日精上浮 月液下流 真氣順生 金風反和 瓊林發藥 玉樹

花敷 法輪三轉 流霞七波 天外長謠 虛裏空歌 令諸仙人明道

優劣 又告仙人曰 上道之希 其法甚微 神力至妙 不可名言

略示希有 以與汝分別 仙人歡喜 禮謝天尊 唯願大聖時見影響

言畢辭別 復歸下界

下元品第十一

爾時 眾妙天尊 以十月十四日晨朝之時 與諸大聖 五千萬
億真仙之眾 俱從丹天之中 星宮之內 應運下世 威儀度物 先
當引日入左目 月入右目 左斗昇左耳 右斗昇右耳 南斗蓋通天
之端 北斗在瓊簪之下 中斗在神足之間 碧霞縈左鬢 素霞縈右
鬢 丹霞映三理之中 玄雲浮玉枕之上 青龍吟左 白虎嘯右 金
鳳前唱 玄武擊節 五星吐氣以迴繞 陰輝停虛以懸照 慶霄纏幕
仙雲起蓋 諷誦靈篇 虛吟萬籟 地涌寶樹 隱草萌萐 芝蘭脈
發 積雪冰消 寒谷和氣 溟泉吐溫 神煙逆吹 召魄呼魂 雲雷
揮音 洪靈翟精 謠歌靈章 空洞虛鳴 聾瞽聰察 擘蹙復行 河
海靜波 昏霧廓清 真光浮輝 寥朗長天 五辰合度 三景齊明
異類親睦 百穀豐盈 怨敵解圍 天下太平 正道雄張 妖魔滅形
爾時 天尊俱乘星宮 齊整雲庭 告群生之吉祥 應眾仙之靈
瑞 鼓橐浮虛 俯臨太無 下元吉慶 景福群儲 進道修德 理契
神符 紫藏交絡 六府花敷 神力變於下士 真氣流於太空 御運

太上大道玉清經卷四

清微藏書閣

垂期 玄中優游 於是萬變不盡 須臾 令冬林以發榮 使枯木以
花敷 復含生以反真 攝萬類以藏初 收道幽寥 寂簡高居 如此
神力 登應金口

爾時 丹臺仙人 夙承上元皇極天尊金口之敕 睹此祥瑞 知
是天尊下降神州 即出丹臺 遙見玄中光明赫奕 星宮高妙 幡蓋
彌天 羅列真儀 遍滿虛空 是諸仙人叩頭 上請天尊降於丹臺
須臾之頃 天尊即命左真一人通命仙人曰 我應運教化 主知下元
度諸新學證成真仙 諸有善功 名著青籙 晨夕求願 香煙熏於
帝庭 清唱聞於太一者 我當示其進修之道 命群魔以待衛下界凡
夫迴心真正下元齋戒 為其九祖 我當拔濟存亡二代 未聞令聞
未見令見 未解脫者令其解脫 諸有病苦 我當療治 怖畏之者
令其安隱 我今法當降下地中 宣道布化 中元之時 正一天尊以
下丹臺 為汝說法 汝功德圓備 以具六通 得無閔智 但以身非
自然 後學成道 所以爾者 未得入登大羅之上 諸學成道 但至
自在 長存不死 名著左契 塵劫如瞬 形隨日新 汝等諸仙即當
其人 奈何兆民形命蜉蝣 朝生暮死 與道相絕 汝當知之 爾

時 仙人隨從天尊 暫治地中 下元施化 濟度群生
爾時 天尊與諸真仙微塵之眾 俱御浮霞明星寶宮 以汎其上
下至地 中列諸星宮 去地七仞 凝
九色慶雲以為大城 七變光氣以為樓臺
萬變金精以為四門 金剛寶光以為關棧
太虛真氣以為寮孔 忍辱寶光以為卻敵
智慧寶光以為城塹 玄源洞清以為泉池
四信寶光以為階道 六度寶光以成寶樹
戒珠寶光以為花實 朱雀寶光以為幢蓋
青龍寶光以為神麾 白虎寶光以為瑞節
玄武寶光以為鐘磬 玄風寶光以為仙樂
法雷寶光以警眾生 法輪寶光以宣道化
空洞寶光演出靈文 萬氣寶光以召生魂
神符寶光以召死魂 陰生寶光以起枯骨
九轉寶光以除痼疾 太和寶光以為天廚
甘露寶光以為良井 日月寶光以為燈燭

太上大道玉清經卷四

清微藏書閣

香雲寶光以為飛蓋 天花寶光以為禾薦地
爾時 天尊以一慈力流出諸光 上極無上 下窮無下 十方世
界 皆悉洞徹 遙見天尊 如在目前 此會大眾 亦睹十方 猶如
指掌 生死二魂 皆悉乘光 一時雲萃 群妖奉節 自喪其精 亦
皆乘光 匍匐而至 爾時 諸地水神 排破堅冰 撥開積雪 湧
出半身 飲和至化 爾時 地中草木 遊根伏牙 悉皆湧出 其纒
見霜雪 盤施甲裂 騰雲吐紅 須臾之頃 神嶽冰消 溟津凍泌
地乳瓊漿 天垂甘澤 天尊凝視良久 喜諸群微 心知向道 乃開發金顏而啟法口
怡然微笑 萬變真光 流出金吻 十方世界 皆於光中洞觀真相
欣喜踴躍 不覺自失 人及非人 悉皆傾想 注念真光 入其心目
三日三夜 停然不動 亦無勞極 又於真光之中 各各見其魂魄
圍繞天尊 須臾之頃變成嬰孩 入其身中 各坐府內 湛然不動
自覺其身改為童子 色美髮黑 氣力如雲 時諸死魂飲和生氣
悉成人形 反真復胎 靈魔變節 道德成心 地水之神半身沐光
以極其靈 胎卵潛胞 隨母獲安 皆含正氣 開剖之日 順性成就

飛走輕利 無諸天傷 積疾新痾 登即痊除 群蟲不螫 毒草樹滅

天尊告諸有生言 此非自然 皆因道化 一瞬之頃 神力周備
萬物以具 受真正氣 至十五日日中之時 下土凡夫各獻丹誠
并齎供具 以慶下元 盡世所有 供養天尊
天尊告諸仙人言 凡夫不同 或獻丹誠 或獻珍寶 及以穀帛
一香一味 一塵一色 大道慈悲 應為納受 為說正法 示正威儀
長其信根 令其歡喜 以是因緣 遠離邪僻 免脫生死 長入道流
可不善哉 可不善哉 是時諸仙人及非人 天地之間有形無形
悉皆同聲 一時稱善 當此之時 香光徘徊 流霞四象 三景
交道 互西互東 真謠長虛 梵歌太空 寶蓋浮煙 長幡引風 龍
王負鑪 以散反魂 仙童擊磬 居城四門 天樂和善 響徹無邊
能令眾生虛裏披玄 寂坐飛龍 默誦靈篇 植根先劫 樹果後來
見在無際 都忘二邊 泯諸煩滓 無心默淵 自冥光氣 柔弱剛堅
天尊說此法已 即入大悲大定 須臾之頃 寒谷吐風 吹諸幢蓋
鏗鏗鈴鈴 虛響空鳴 變為悲聲 玄雲不流 真光湛然 神煙

太上大道玉清經卷四

清微藏書閣

籠象 七曜收輝 日道南移 月路陰歸 九壤復堅 眾流沍溟 水
精浮景 遊氣潛形 濕族淵居 甲否盤滌 蠢伏藏氣 蟻蚊吞聲
爾時 天尊至十五日禺中之時 微動左手 抗齊神心 彈指三
聲

爾時 群仙及諸凡夫 皆見天尊出大悲大定 歡喜稽首 而作
是言 慚愧慈尊道化有勞 濟度無窮 幽顯解脫 歡喜無量 聖凡
慶快 不審天尊 眾生未度之前 何故金容啟笑 化度之後 翻入
大悲 日月不明 七曜收輝 霜氣吐凝 嚴風扇威 皇道南移 月
路陰歸 群物顛顛 五內含哀 彈指之聲 令眾慘悲 願為分別
釋結除疑

天尊告言 善男子 汝當知我初微笑 喜眾迴向 易得度脫
得度之後 勿忘大悲 若忘大悲 雖度非度 以是因緣 故我為諸
眾生入大悲大定 彈指當心 示其內外和合 三轉法輪而為群生
無上大道 法應如此 諸人聞說 眾疑頓決 重復稽首天尊 謝煩
金口 中時已至 欲請天尊聖眾慈悲 為受眾生微塵供養 成就之
心 願垂愷悌

爾時 天尊不違其意 大眾列坐會中而受供養 爾時 天尊以方便力故 臨受食時 即命中真左侍 飛往上界大羅之中 取太虛寶光之器二口 各圓十分 安著座上 玄虛之中 一器先盛大羅天中自然天廚 日華月液 以一空器擬盛下界眾生所獻珍心 爾時 四天之下 一切人民及諸異類 持物施者 或手 或口 或心 所獻之物 一時俱到天尊座前 各各心疑寶器狹小 天尊知其疑惑 即告之曰 汝等但施 勿嫌器小 諸人心疑 不敢仰答 天尊又曰 汝心狐疑 不能決定 我知汝心嫌此器小 是時天尊即命中真捧下寶器 小傾其口 而向諸人 即告之言 汝欲施供具之者 先令人王 次及群臣 兆民 異類 各持本心 入我器中 諸人受命 俯觀寶器 忽見無際 不測淺深 四天之下 一切人民一時持獻而入器中 或車或輿 或步或騎 升沉飛走 都無妨礙 未入之人見器猶小 入中始知器無邊際 歎未曾有 而作是言 我等小智 欲以度量天尊太虛寶器 不受塵露 是我各煩惱覆障 不能得知大道法器 向若不蒙天尊故命中真敬器示我 我心狐疑 施亦無福

太上大道玉清經卷四

清微藏書閣

爾時 諸人入寶器已 周遍按行 莫知其極 見有無量世界並在其中 仰視上方 天天相次 日月星辰倍明下界 寶器之中盡是天真大聖 空間虛白 甘露大海 百寶山嶽 天禽天獸 隱草瓊樹 香雲香風 法雷法雨 是時大眾復觀所施 蓋不足言 次周行忽至天尊說法之所 從器中出 亦不覺知 其時圓光停照 時不改中 天尊媿其盡心獻諸供具 欲以方便 示其稀有天廚上味 即告大會之中國王 王子 群臣 兆民 仙人 非人等 而作是言 我愧汝等為道遠來 獻我供養 我以為汝受納之訖 諸人慚其供具微少 默而無答

天尊以知其意 重告之言 下元大慶 萬福俱會 齋時以至 恐汝饑虛 我此一器之中 先盛上界太虛天廚 欲施汝等無上法食 汝當列坐 受我法食 是人諸人以次而坐 復思前施 及入太虛寶器之時 各更狐疑 互相謂言 向者施供及入寶器 是為夢中 為是覺時 寶器極小 若是覺時 不應得入 若是夢時 應無施心 又復寶器纔經一寸 一切天地並在其中 我等恍惚 未能辯了 爾時 眾中有一人王 名曰辨心 告諸人言 我等大眾未得真

道常如夢行 法器大小 入與不入 施與不施 一種同夢 汝等勿言 但當思念 中時以至 天尊哀愍 施我等眾無上法食 須臾之頃 天尊即命七童使者 駕六龍大車 載天寶器 以次施食 任諸大眾 仙人 兆人等而取多少食之 既飽隨意 懷藏器中 天廚都不減少 諸人食之 五藏花敷 腸胃盈滿 耳目聰察 關節調理 眾病永滅 六識開張 思惟道恩 得六通慧 反照前後 九萬大劫所經業緣 皆如指掌 方悟前心定如夢幻 爾時 辦心與諸大眾禮拜天尊而作是言 不審天廚亦有盡不

天尊告言 虛空若盡 天廚乃盡 是故 大道有無盡藏 而給眾生 辦心又問 食此天廚 果報云何

天尊告言 食天廚者 壽命無盡 形同太虛

爾時 天尊即命中真傾此寶器 散於天廚 著空虛中 所拂草木皆成花實 日華月液變成甘露 汎空中者化成真光和氣 萬劫之後 若有道德天子及諸學人飲我甘露 餐我和氣 凡百人民食我果實 隨其根性 皆獲利益

爾時 會中睹此殊妙 不可思議 合眾上啟天尊而作是言 無

太上大道玉清經卷四

清微藏書閣

上大道至法微妙 神力無比 而此大眾已蒙天尊慈悲之澤 不揆塵穢 欲從天尊暫陪霄駕 遊於上界 以申禮願 所希便足 不審天尊大慈之心願見聽許 天尊告言 汝等大眾法食之後 心中何如

時會大眾各各答言 法食之後 萬倍於前

天尊又問 昔夢之心 存亡如何 答言 法食之後 夢想頓忘 天尊告言 汝等諸人欲見上界 各各復思 令汝自見 是時大眾復思良久

天尊告言 思何所見 答言 都無所見 又問 思何所聞 答言 思無所聞 又問 汝心何所起 眼無所見 汝心何所滅 耳無所聞 答言 心無所起 眼無所見 心無所滅 耳無所聞 天尊告言 無見之見 謂之正見 無聞之聞 謂之正聞 無上大道 法無起滅 無聞無見 無去無來 無身無心 無光無相 形洞太虛

天尊說此語已 攝諸大會入太虛寶器 擲著上方 是二寶器同時而上 到於太空大羅之中 如彈指頃 是時諸人各各皆見元氣之尊虛寥獨坐 在於玄虛 中出空洞自然靈章 亦無光相 窈冥寥寂

是時諸人各申禮願 叩頭良久 問訊天尊而作是言 不審天尊大聖虛寥獨絕 與世永隔 都泯聲譽 使下界凡夫翹誠渴仰 欲求多福 無處依歸 唯願天尊宣揚道化 救脫來生 又復叩頭良久 伏地不起 天尊不答 須臾之頃 空虛滅無 唯見天中汎然遊氣 如有如無 纔聞清天之上 微有空洞靈音 俯聽則有 仰視則無 綿冥冥 諦聽或聞 其辭希微 不可得解 天尊又於會中 舉大慈手 入於有頂 接取諸人還著會中 須臾之間 又環遶擲之 周旋十方微塵世界 一彈指頃 以周七匝 還到會中 諸人各各自知乘道神力 得見十方虛空道境 又從器中而出 了了分明 心中無惑 始知上界空無所有

爾時 天尊與諸來眾 到十六日夜三更之初 攝取太虛天寶 及諸光氣 一切威儀俱入星宮 是時天下仙人 神人 靈人 人王 兆眾皆知天尊真化事畢 欲還上界 恐畏以後無處決疑 新入道人及諸來生欲建三元齋請 不明科法 不如今日上聖化度 自在解脫 合眾苦請天尊教示後學 建福修功 必有成剋 爾時 天尊告諸人曰 三元大慶自是道法自然之良辰 眾真朝

太上大道玉清經卷四

清微藏書閣

拜太極之吉日也 下仙凡人修身拔亡之要機也 此時詮簡功過 校定吉凶 上帝下觀 司非糾彈 地司上奏 水府錄簡 有功成真 過謫罪魂 冥司考罰 苦不能言 汝欲齋請 當依正法 三日三夜 燒香禮悔 精思念道 吟誦經戒 常存十念 一念道恩 二念經恩 三念師恩 四念天恩 五念父母恩 六念善神恩 七念施主恩 八念善友恩 九念過去恩 十念見在恩 天尊告言 若有善男女等 修此十念 生十善道 一善之中 十神扶衛 故名百神之神 人無十念 名為百惡 所謂百種善神翻賊其身 上士十念 身得真仙 中士十念 身得延壽 下士十念 身得長年 天尊告言 三元齋請 隨時豐儉 要在聖盛潔內外合同 當此之日 諸天大聖皆悉下觀 善神監齋 在人左右 三日三夜 功過上聞 子當精進 殷勤勿怠 道在玄中 遙鑒子心

三元寶經流通品第十二

爾時 四天之下諸國天子前進作禮 辨心天子而作是言 不審天尊演說此經 當何名之 云何奉持 云何流布 云何供養 云何付囑 願為分別 開示未聞 天尊告言 善男子 此經名 太上大

道三元寶經 如經奉持 廣宣流布 四天之下 使不斷絕 此經所在
之處 別笈盛貯 燒香供養 付囑有道國王 王子 大臣 學真道
士 齋戒之處 為人解說 開悟未聞 時會大眾聞天尊所說 燒香
散花 讚歎圍繞 奉行教敕 是時 天尊至五更之初 浮空而去
是諸仙人徘徊雲路 戀慕霄駕 而作步虛曰
飄飄上雲路 黯黯入長霄 星官日去遠 光陰劫數遙
仰聽金顏隱 傾想佇神焱 願得映霞軫 焚香稽首朝
玄風轉飛蓋 紫氣汎仙車 浮空不待駕 合景忽昇無
徘徊哀下界 顧盼愍群諸 三元真化畢 翛然入大虛
萬氣浮空上 千光合太微 霄間望華蓋 虛裏盼霞衣
真儀入雲路 圓曜逐風飛 願得三元會 金容乘運歸
爾時 下界仙人及諸大眾作步虛已 翹仰雲路 傾盼神光 目
送霞焱 拜辭真帝 須臾之頃 天垂紫雲 地起輕霧 煙霞交合
唯聞天樂漸高遠 時會大眾各還本土 依金口宣揚道化 流布寶
經 齋講設會 四天之下 皆蒙玄祐 福德無盡

太上大道玉清經卷四

清微藏書閣

太上大道玉清經卷之四竟

天運癸巳年寅月正一天師清微弟子洪鼎堅羅大英恭錄彙編